

### Vooraf:

- Reël verversings vir die groep.
- Deel die teks vooraf met die groep. 'n Ander vertaling of twee sal help om die teks meer volledig te hoor.

### Tafelmaniere

Die doel van hierdie tafelmaniere is om ruimte te skep waar ons God kan hoor en voorkom dat een persoon die gesprek oorheers.

Herinner mekaar aan julle groep se tafelmaniere wat julle saam geskryf het.



### Verwelkoming:

- Verwelkom almal.
- Is daar iemand nuut in die groep?
- Oorweeg dit om 'n kers aan te steek om julle groep te herinner aan God se volledige teenwoordigheid deur die Heilige Gees.

### Bid saam:

Neem 'n paar oomblikke. Raak stil en rustig. Haal diep asem. Laat iemand die volgende gebed lees:

Wees my genadig, o God, volgens u troue liefde.  
Wis tog my sonde uit, op grond van u barmhartigheid.  
Was my skoon van my skuld.  
Reinig my van my sonde.  
Want ek ken my oortredings en my sonde is gedurig voor my.  
Teen U, U alleen, het ek gesondig; ek het gedoen wat vir U verkeerd is.  
Daarom is u uitspraak reg en u oordeel regverdig.  
Want ek is as sondaar gebore, en was dit toe my ma swanger geword het.  
Maar U verwag waarheid in die hart.  
U leer my om wysheid te besit.  
Neem weg my sonde met hisop sodat ek skoon kan wees,  
was my dat ek witter as sneeu kan wees.  
Gee my tog weer blydschap en vreugde;  
U het my stukkend gebreek, laat my weer vol vreugde wees.  
Moenie let op my sondes nie, en wis al my oortredings uit.  
Skep vir my 'n rein hart, o God.  
Gee my 'n nuwe, standvastige gees.  
Moenie my verban wég van u teenwoordigheid nie,  
en moenie u Heilige Gees van my af wegneem nie.  
Gee my tog weer die vreugde van u redding  
en maak my gewillig om U te gehoorsaam.  
Dan sal ek oortreders u weë leer, sodat sondaars hulle tot U sal bekeer.

## Groepwerk Gesprek Raamwerk

Verlos my van bloedvergieting, God, my Redder-God.  
Dan sal ek voluit sing van u regverdigheid.

**Amen.** (Verwerk uit Psalm 51:3-16 – Nuwe Lewende Vertaling)

### Gesels:

Ysbreker:

Deel vir elkeen 'n roomysstokkie uit. Elke kind moet dit oor hulle neusbrug met sellotape plak, amper soos 'n bril. Kry 'n maat en tel jou maat se wimpers van die linkeroog se onderlid. Albei moet gelyk probeer tel.

(As julle klaar is, moet elke kind hulle roomysstokkie hou.)

Vrae:

- Hoeveel wimpers het jou maat?
- Hoe maklik/moeilik was dit?
- Hoe het jou maat gelyk terwyl die jou wimpers getel het?
- Wie het dalk gedink aan die Afrikaanse idioom "Om met jou neus in die lug te loop." Wat beteken die idioom?

### Teks:

Laat iemand die teks een maal hardop lees.

#### **Matteus 7:1-12 (Die Boodskap)**

<sup>1</sup>"Moenie so gou foutvind nie. <sup>2</sup>As jy ander mense links en regs veroordeel, gaan God eendag presies dieselfde met jou doen.

<sup>3</sup>"Waarom is jy so haastig om foute in ander mense se lewe uit te snuffel terwyl jy blind is vir al die sondes in jou eie lewe? Waarom sien jy so gou die kleinste splintertjie in jou vriend se oog raak terwyl jy blind is vir die groot houtstomp wat in jou eie oog vassit? <sup>4</sup>En dan waag jy dit so ewe om vir jou vriend te sê: 'My ou broer, kom laat ek gou daardie splintertjie uit jou lewe wegvat sodat jy weer reg kan leef,' maar jy sien nie die groot foute in jou eie lewe raak nie. <sup>5</sup>Jou skynheilige! Haal eers die houtstomp uit jou eie oog uit, dan sal jy goed genoeg kan sien om daardie klein splintertjie uit jou vriend se oog te haal.

<sup>6</sup>"Wees versigtig wanneer julle tussen mense is wat geen respek vir God het nie. Hulle verstaan glad nie hoe groot en heilig Hy is nie. Moenie julle tyd mors om met hulle oor God te praat nie. Soos 'n trop varke sal hulle sy goedheid onder hulle voete vertrap. Boonop gaan hulle julle ook nog beledig en vervolg."

<sup>7</sup>"Julle moet nooit moeg word om te bid nie. Vra en God sal vir julle gee. Soek en julle sal kry. Klop aan God se hemelse deur en Hy sal vir julle kom oopmaak. <sup>8</sup>Want

## Groepwerk Gesprek Raamwerk

elkeen wat vra, ontvang; elkeen wat soek, kry, en elkeen wat klop, tref uiteindelik 'n oop hemelse deur aan.

<sup>9</sup>“Jou hemelse Vader wil net die beste dinge vir jou gee. As jy 'n pa is, behoort jy dit goed te verstaan. Jy wil mos graag net goeie dinge vir jou kinders gee, nie waar nie? <sup>10</sup>As jou kind vir jou 'n stukkie brood kom vra om te eet, sal jy tog nie vir hom 'n klip gee nie. Jy sal ook nie vir hom iets slegs soos 'n slang gee as hy vis wil hê om te eet nie. Nou ja, God maak ook nie so met sy kinders nie. <sup>11</sup>As julle klomp slegte mense net goeie dinge vir julle eie kinders gee, hoeveel te meer sal julle hemelse Vader dit dan nie doen nie? Ek verseker julle: Hy sal net die beste dinge gee vir diegene wat Hom daarvoor vra.”

<sup>12</sup>“As daar een goue reël is waarvolgens julle moet lewe, is dit die volgende: vra julle elke dag af hoe julle wil hê ander mense teenoor julle moet optree. Gaan tree dan eerste so teenoor hulle op. As julle so leef, doen julle alles wat die Bybel van julle vra.

Laat elkeen die teks 'n tweede maal self deurlees en wag dat iets vir hul uitstaan.

### Gesels in die groep oor die volgende:

- Gesels 2-2/ 3-3 oor wat julle nie verstaan nie of wat vir hulle vreemd is. (*As die tieners nie vir mekaar kan help om meer duidelikheid te kry nie, kan hulle in die groep vra wat hulle nie verstaan nie.*)
- *Verduidelik:* Die mense met wie Jesus gepraat het, was mense wat met hul hande gewerk het – boere, vissermanne, houtwerkers, bouers. Hulle sou almal al stof in hul oë gehad het en beslis al iets soos 'n splinter. Dink gou weer terug aan Jesus se vergelyking: “Jou oog is 'n lamp vir jou liggaam. 'n Suiwer oog laat die lig instroom sodat jou binneste geheel en al lig word.” (Matt. 6:22) Wat verteenwoordig jou oog en wat verteenwoordig die splinter?
- Varke was vir die Jode onrein – hulle het dit nie aangehou nie. Mense van ander lande af het wel varke aangehou. Varke is nie baie kieskeurig oor wat hulle eet nie, so mense het baie keer sommer hul afval kos uitgegooi en dan het die varke dit geëet. Wat sal met 'n pêrel gebeur as jy dit vir 'n vark gee om te eet? So, as jy vir iemand wat jy nie goed ken nie “pearls of wisdom” gooi oor hul lewe, wat gaan daarmee gebeur?
- As Jesus oor gebed praat, wat sê hy van God en wat sê hy van mense?
- Jesus sê vir ons dat ons eintlik maar moet onthou dat ons vol foute is, voor ons met mense oor hulle foute praat. Hoe wil jy hê moet mense met jou kom praat oor jou foute?
- **Wat sê die teksgedeelte vir jou? Wat het vir jou uitgestaan? Wat is die boodskap wat Jesus vandag vir jou wil gee?**

## Groepwerk Gesprek Raamwerk

**Aktiwiteit:** Die balk in jou oog.

Ons is in Lydenstyd. Dis die tyd wat ons Jesus se pad na die kruis onthou. Een van die doelwitte van die kruis was juis om mense bewus te maak van sonde, omdat ons soms ons eie sonde wegsteek en ander s'n probeer uitvang. Jesus se kruis het kom wys dat ons Hom nodig het.

Kry jou roomysstokkie en skryf die een sonde waarmee jy sukkel of waarmee jy mense onlangs baie seergemaak het daarop neer. Gaan plak dit dan op die kruis in die middel van die saal.

**Bid vir mekaar oor wat die teks vir julle sê, asook vir wat alles vir julle voorlê vir die res van die week.**

Voor julle uitmekaargaan, maak onder mekaar seker oor die volgende:

- Is almal op die kommunikasie-lys?
- By wie kom die groep volgende week bymekaar?